

BOSNA I HERCEGOVINA  
PARLAMENTARNA SKUPŠTINA  
BOSNE I HERCEGOVINE  
DOM NARODA  
Broj: 02-02-3/99  
Sarajevo, 25.februar 1999.g.

## Z A P I S N I K

### sa 3. sjednice Doma naroda Parlamentarne skupštine Bosne i Hercegovine, održane 25. februara 1999. godine

Treća sjednica Doma naroda počela je sa radom u 12,45 sati.

Predsjedavajući, Vladimir Šoljić konstatovao je da sjednici prisustvuje 13 delegata. Odsustvuje Mirsad Ćeman iz razloga što je podnio ostavku na dužnost delegata u Domu naroda.

Pored delegata, sjednici su prisustvovali: članovi Vijeća ministara BiH, Hanns Schumacher, prvi zamjenik visokog predstavnika i predstavnici sredstava informisanja.

Predsjedavajući Doma je predložio određene dopune prijedloga dnevnog reda koji je delegatima dostavljen ranije i naglasio da su iste uzrokovane zahtjevima OHR-a i da su vezane za rokove iz Madridske deklaracije.

U raspravi povodom prijedloga dnevnog reda učestvovali su: Vinko Zorić, Avdo Čampara, Momir Malić i Izet Žigić.

Za treću sjednicu Doma naroda Parlamentarne skupštine Bosne i Hercegovine usvojen je slijedeći

#### D N E V N I R E D:

1. Usvajanje zapisnika sa 2. sjednice Doma naroda,
2. Obavijest o ostavci delegata Mirsada Ćemana,
3. Verifikacija mandata delegata,
4. Prijedlog zakona o državnoj himni Bosne i Hercegovine,
5. Prijedlog zakona o izmjenama i dopunama Zakona o imunitetu,
6. Izbor delegacija Parlamentarne skupštine BiH u:
  - a) Organizaciju o evropskoj sigurnosti i saradnji (OSCE),
  - b) Centralno Evropsku inicijativu (CEI),
  - c) Interparlamentarnu grupu BiH u Interparlamentarnoj uniji,
  - d) Parlamentarnu skupštinu Vijeća Evrope,
7. Donošenje odluke o osnivanju privremenog Sekretarijata Parlamentarne skupštine BiH,
8. Nacrt okvirnog zakona o privatizaciji preduzeća i banaka u BiH, i
9. Delegatska pitanja.

#### Ad.1. Usvajanje zapisnika sa 2. sjednice Doma naroda

Zapisnik sa 2. sjednice Doma naroda usvojen je bez primjedbi.

## **Ad.2. Obavijest o ostavci delegata Mirsada Ćemana**

O ostavci Mirsada Ćemana na dužnost delegata u Domu naroda delegate je upoznao predsjedavajući Dom naroda Vladimir Šoljić.

Dom naroda ostavku Mirsada Ćemana je primio k znanju.

## **Ad.3. Verifikacija mandata delegata**

S obzirom da je Mirsad Ćeman bio član Verifikacione komisije, predsjedavajući je pozvao predstavnika Kluba Bošnjaka da u ovu komisiju odredi jednog člana kako bi Komisija mogla održati sjednicu.

Ispred Kluba Bošnjaka u Komisiju je određen delegat Avdo Ćampara.

Ispred Verifikacione komisije izvještaj je podnio delegat Avdo Ćampara. Komisija je konstatovala da je umjesto Mirsada Ćemana Klub Bošnjaka u Domu naroda Federacije Bosne i Hercegovine, na sjednici održanoj 24. februara 1999. godine izabrao Dževada Mlaću, kandidata Stranke demokratske akcije. Takođe je Komisija konstatovala da je na istoj sjednici, od strane Kluba Hrvata, za delegata u Domu naroda Parlamentarne skupštine Bosne i Hercegovine izabran Ivo Živković, kandidat Nove hrvatske inicijative.

Dom naroda je verifikovao mandat Dževadu Mlaći i Ivu Živkoviću.

Predsjedavajući je konstatovao da se verifikacijom mandata Dževada Mlaće i Ive Živkovića vrše zamjene, odnosno popunjavanje članova u određenim radnim komisijama Doma naroda, tako da Dževad Mlaćo postaje član Komisije o ustavnim i pravnim poslovima, Komisiji o pitanjima finansija i budžeta i drugi zamjenik predsjedavajućeg u Komisiji o pitanjima ljudskih prava, imigracije, izbjeglica i azila; a Ivo Živković član Komisije za vanjsku trgovinu i carine i predsjedavajući komisije o pitanjima ljudskih prava, imigracije, izbjeglica i azila.

Delegati Dževad Mlaćo i Ivo Živković su potom dali svečanu izjavu.

## **Ad.4. Prijedlog zakona o državnoj himni Bosne i Hercegovine**

U okviru ove tačke dnevnog reda prvo su saslušane tri verzije tonskog snimka prijedloga melodije himne, a zatim je predsjedavajući upoznao delegate o izmjenama koje je usvojio Predstavnički dom u odnosu na predloženi tekst Zakona o državnoj himni, kao i da je usvojena muzička verzija Himne pod šifrom "Intermezzo". Zatim je otvorio raspravu o Prijedlogu zakona.

Na Prijedlog zakona o državnoj himni Bosne i Hercegovine, u ime Kluba hrvatskog naroda Vinko Zorić je podnio amandmane, i to: da se u naslovu i članu 1. Prijedloga zakona briše riječ "državna". Naglasio je da Klub podržava sve što su usvojili poslanici u Predstavničkom domu u vezi sa ovim zakonom.

Delegat Avdo Ćampara je, u ime Kluba Bošnjaka, u potpunosti podržao zakon koji je usvojio Predstavnički dom Parlamentarne skupštine BiH.

U ime Kluba srpskog naroda Đoko Pajić takođe je podržao tekst zakona i izvedbu himne koje je usvoji Predstavnički dom, ali je predložio da se riječ "državna" briše iz naslova zakona.

U raspravi su učestvovali: Avdo Ćampara, Izet Žigić, Vinko Zorić, Đoko Pajić, Ismet Šarčević, Momir Malić, Pero Marković, Drago Ljubičić i Momir Tošić.

Povodom diskusije riječ je zatražio i Hanns Schumacher, koji je, pored ostalog, naglasio da je usvajanje Zakona o državnoj himni BiH, kao i muzičke izvedbe Himne od strane Predstavničkog doma sa velikim zadovoljstvom pozdravila i međunarodna zajednica, kao i domaća javnost. Naglasio je da je od

velike važnosti da isto to učini i Dom naroda, pa je apelovao da se Zakon usvoji u istom tekstu, jer u suprotnom, zakon nije usvojen.

U toku diskusije zatraženo je i dato više pauza radi usaglašavanja.

Poslije izvršenih usaglašavanja Klub hrvatskih delegata je ostao pri amandmanu na naslov i na član 1, da se briše riječ "državna".

U ime srpskih delegata, kao kompromis, Momir Tošić je iznio prijedlog da se zakon usvoji uslovno, tj. da se usvoji jedan od prijedloga melodije himne naglasivši da se s ovim prijedlogom složio i zamjenik Visokog predstavnik Hanns Schumacher, te da i Predstavički dom prihvati predložene izmjene u naslovu i članu 1. Zakona,

Delegat Avdo Čampara je, u ime Kluba Bošnjaka, saopštio je da ni jedan od ovih prijedloga ne prihvataju. Naglasio je da Klub Bošnjaka ostaje pri tome da se usvoji tekst zakona onako kako ga je usvojio Predstavnički dom. Istakao je da se ne može usvajati muzički dio Himne bez zakona i naglasio da je ovaj zakon od vitalnog interesa, te da u tom smislu treba obaviti i glasanje o svim prijedlozima.

Poslije iznošenja prednjih stavova predsjedavajući je pristupio glasanju o podnesenim amandmanima i prijedlozima. Prvo je dao na glasanje amandmane hrvatskih delegata.

- **za** amandmane su glasali svi hrvatski delegati.
- bošnjački delegati su glasali **protiv**
- srpski delegati su se **uzdržali** od glasanja.

Predsjedavajući je konstatovao da amandmani nisu usvojeni.

Zatim se Dom naroda izjasnio o prijedlogu srpskih delegata, da se Zakon o državnoj himni BiH usvoji, uz odluku da se Predstavnički dom usaglasu u odnosu na amandmane na naslov i član 1. Zakona.

**Za** ovaj prijedlog su glasali svi srpski i hrvatski delegati, dok su bošnjački delegati glasali **protiv**.

Predsjedavajući je konstatovao da ni ovaj prijedlog nije usvojen.

Predsjedavajući je dalje konstatovao da Dom treba da se izjasni o Zakonu u dva dijela, i to prvo o muzičkoj verziji, a potom o tekstu Zakona. Replicirao mu je delegat Avdo Čampara, predloživši da prvo treba glasati o Zakonu, a prijedlog melodije himne koji dobije većinu glasova biće sastavni dio Zakona.

Poslije rasprave u kojoj su učestvovali: Avdo Čampara, Vladimir Šoljić, Izet Žigić i Vinko Zorić, predsjedavajući je predložio da se Dom prvo izjasni o prijedlozima melodije Himne i konstatovao da su se klubovi izjasnili da je u pitanju vitalni interes, zbog čega će se glasanje obaviti po klubovima.

**Za** prijedlog melodije himne pod šifrom "Intermezzo" glasali su svi hrvatski i srpski delegati.

Bošnjački delegati nisu željeli da se izjašnjavaju.

Predsjedavajući je konstatovao da ne postoje uslovi da se glasa o Zakonu u cjelini, te da Zakon o državnoj himni Bosne i Hercegovine Dom naroda Parlamentarne skupštine Bosne i Hercegovine nije usvojio.

#### **Ad.5. Prijedlog zakona o izmjenama i dopunama Zakona o imunitetu**

Predsjedavajući Doma je konstatovao da je Prijedlog ovog zakona razmatrala Komisija Doma naroda o pitanjima ljudskih prava, imigracije, izbjeglica i azila, pa je pozvao predsjedavajućeg te komisije da podnese izvještaj.

Pero Marković, predsjedavajući Komisije o pitanjima ljudskih prava, imigracije, izbjeglica i azila podnio je izvještaj istakavši da je Komisija razmotrila Prijedlog zakona o izmjenama i dopunama Zakona o imunitetu, kao i obavještenje predsjedavajućeg Predstavničkog doma o tome da je amandmane na čl. 2. i 4. Prijedloga izmjenama i dopuna Zakona o imunitetu taj dom usvojio. Komisija Doma naroda podržala je amandmane koje je na isti zakonski prijedlog usvojio Predstavnički dom, i to: da se u članu 2. iza broja "4" dodaju riječi "i 7." a u članu 4. ispred tačke 1. dodaju se riječi: "Nadležni organi za oduzimanje imuniteta licima iz člana 3. ovog zakona su:"

Sa 14 glasova **za** i **jednim** uzdržanim glasom Dom naroda je usvojio Zakon o izmjenama i dopunama Zakona o imunitetu.

#### **Ad.6. Izbor delegacija Parlamentarne skupštine BiH u:**

**a) Organizaciju o evropskoj sigurnosti i saradnji (OSCE)**

**b) Centralno Evropsku inicijativu (CEI)**

**c) Interparlamentarnu grupu BiH u Interparlamentarnoj uniji,**

**d) Parlamentarnu skupštinu Vijeća Evrope.**

Predsjedavajući je podsjetio delegate da su dobili dopis Predstavničkog doma o izboru delegacija u navedene organizacije.

Takođe je upoznao prisutne sa pismom Visokog predstavnika u kome predlaže da se uputi zahtjev Parlamentarnoj skupštini Vijeća Evrope radi proširivanja delegacije Parlamentarne skupštine u Vijeću Evrope za još jednog člana iz reda opozicionih stranaka.

Zaključeno je da se prihvata ovaj prijedlog s tim da predsjedavajući oba doma Parlamentarne skupštine BiH upute zahtjev Parlamentarnoj skupštini Vijeća Evrope.

Dom naroda je jednoglasno usvojio sastav delegacija koji je usvojio Predstavnički dom, i to da **sastav delegacije** čine u:

- **Organizaciji o evropskoj sigurnosti i saradnji (OSCE):** Adnan Jahić, Miodrag Deretić i Vladimir Šoljić.

- **Centralno Evropskoj inicijativi (CEI):** Mara Perkanović, Nikokla Špirić, Tarik Čaršimamović, Ana Havel, Pero Skopljak, šesti član će biti izabran nakon prijedloga SDP BiH odnosno SD BiH.

- **Interparlamentarnoj grupi BiH u Interparlamentarnoj uniji:** Safet Oručević, Smail Bećirbašić, Ibrahim Spahić, Mirko Banjac, Dragan Mirković, Momir Malić, Vito Rakić, Pero Marković i Pero Mađar. Dva preostala upražnjena mjesta popunit će se predstavnicima političke grupacije SDP, SD i NHI.

**Parlamentarnoj skupštini Vijeća Evrope:** Edhem Bičakčić, Mediha Filipović, Branko Dokić, Momir Tošić i Vinko Zorić.

Dom naroda Parlamentarne skupštine Bosne i Hercegovine je jednoglasno usvojio predloženi sastav delegacija.

#### **Ad.7. Donošenje odluke o osnivanju privremenog Sekretarijata Parlamentarne skupštine Bosne i Hercegovine**

Povodom ove tačke dnevnog reda nije vođena rasprava.

Dom naroda Parlamentarne skupštine Bosne i Hercegovine jednoglasno je usvojio Odluke o osnivanju privremenog Sekretarijata Parlamentarne skupštine Bosne i Hercegovine.

## **Ad.8. Nacrt okvirnog zakona o privatizaciji preduzeća i banaka u BiH**

Predsjedavajući Doma naroda je podsjetio delegate da je Visoki predstavnik zahtijevao da se ovaj zakon uvrsti u dnevni red imajući u vidu rokove koji su postavljeni Madridskom deklaracijom.

Zamjenik predsjedavajućeg, Drago Ljubičić naglasio je da uvažava prijedlog g. Westendorpa, ali je zamolio delegate da prihvate da se usvajanje ovog zakona odgodi do naredne sjednice, kako bi srpski delegati izvršili dodatne konsultacije sa Vladom Republike Srpske.

Delegat Mugdin Herceg je podsjetio da je 1. mart 1999. godine krajnji rok za usvajanje svih zakona koje je donio Visoki predstavnik na privremenim osnovama, pa je zamolio da se to ima u vidu.

Predsjedavajući je predložio da se prijedlog srpskih delegata uvaži, što je i prihvaćeno.

Zaključeno je da se razmatranje i usvajanje Nacrta okvirnog zakona o privatizaciji preduzeća i banaka u BiH odloži za sjednicu predviđenu za 17. mart 1999. godine.

## **Ad.9. Delegatska pitanja**

U okviru ove tačke dnevnog reda predsjedavajući je upoznao delegate da je Dom naroda dobio poziv da uputi delegaciju na Konferenciju koja će se u Bugarskoj održati od 11-13. marta 1999.godine, na temu "Regionalna sigurnost i saradnja u Evropi". Predložio je da to bude delegacija na visokom nivou, te da klub poslanika svakog naroda odredi svog predstavnika. Prijedlog predsjedavajućeg je prihvaćen.

Predsjedavajući je takođe podsjetio delegate da je Predstavnički dom usvojio Zaključak u vezi postupka za razmatranje prijedloga zakona koje podnose pojedinačno poslanici, odnosno delegati. Napomenuo je da se Kolegij Doma naroda dogovorio da se ovaj zaključak prihvati, uz dodatnu rečenicu – "da prijedlozi budu u skladu sa Okvirnim programom rada Doma".

**Dom naroda je usvojio Zaključak kojim se utvrđuje način procedure za donošenje zakona i drugih akata čiji predlagač nije Vijeće ministara BiH i Predsjedništvo BiH.**

Delegatska pitanja i prijedloge postavili su slijedeći delegati:

**Đoko Pajić**, je postavio problem nastavka suđenja pojedincima iz sva tri naroda i izrazio sumnju da se nekima sudi bez razloga, kao i to da ima i političkih suđenja. Tim povodom pozvao je delegate iz sva tri naroda da, ukoliko imaju takvih podataka, da ih dostave Komisiji o pitanjima ljudskih prava, imigracije, izbjeglica i azila, da ih ta Komisija razmotri i predloži nadležnim organima oba entiteta da se pokrene postupak pomilovanja ili amnestije.

**Izet Žigić**, je uputio apel Vijeću ministara i međunarodnoj zajednici da se zaštiti imovina vjerskih zajednica, kao i prostori uništenih bogomolja i da se spriječi promjena namjene u urbanim i neurbanim mjestima gdje su te bogomolje bile.

**Mugdin Herceg**, dao je više prijedloga i pitanja:

1) Pokrenuo inicijativu prema Komisiji o ustavnim i pravnim pitanjima da, u saradnji sa Sekretarijatom Parlamenta i sa ekspertima Ureda Visokog predstavnika, pripremi i stavi u proceduru donošenje odluke o obrazovanju radnih tijela i komisija Doma naroda i Predstavničkog doma.

2) Zahtijevao je aktivan odnos delegata u izradi stalnog poslovnika oba doma.

3) Predložio da Sekretarijat pripremi za Kolegij pregled operativne provedbe odluka donesenih u prethodnom sazivu Doma, te da Kolegij podnese informaciju Domu o potrebi operacionalizacije određenog broja donesenih a neprovedenih odluka.

4) Predložio slijedeće:

a) da Vijeće ministara, polazeći od odredbe čl. 5.tač. 4. Ustava BiH, pripremi za Dom izvještaj o rashodima Bosne i Hercegovine u 1998.godini;

b) da se uputi zahtjev Predsjedništvu Bosne i Hercegovine, polazeći od čl. 5. tač. 3. Ustava BiH, da Predsjedništvo za Dom podnese izvještaj o rashodima Predsjedništva BiH u 1998. godini;

c) Zatražio da Predsjedništvo BiH, polazeći od čl. 5.tač. 3.f. Ustava Bosne i Hercegovine, uz preporuku Vijeća ministara, predloži Budžet za 1999. godinu kojim se finansiraju troškovi potrebni za izvršavanje nadležnosti institucija Bosne i Hercegovine i međunarodnih obaveza BiH.

d) predložio da se na dnevni red Predstavničkog doma Parlamentarne skupštine BiH stavi ratifikacija Sporazuma o posebnim odnosima između Republike Hrvatske i Bosne i Hercegovine.

**Avdo Čampara**, predložio da se od Vijeća ministara zatraži da što je moguće brže predlaže zakone koji će se usvajati na Predstavničkom domu i Domu naroda, kako ne bi dolazilo do nesuglasica, radi toga što još uvijek ima dosta zakona koji su preuzeti od ranije SFRJ i SRBiH, u skladu sa Aneksom II Ustava Bosne i Hercegovine.

**Ismet Šarčević**, postavio je pitanje "može li se za policijske stanice u opštinama nabaviti oprema za izdavanje putnih isprava, što je za sada učinjeno samo u kantonima, zbog čega se ne može blagovremeno udovoljiti brojnim zahtjevima građana"?

Sjednica je završila rad u 18,00 sati.

Magnetofonski snimak sjednice čini sastavni dio Zapisnika.

PREDSJEDAVAJUĆI  
DOMA NARODA  
PARLAMENTARNE SKUPŠTINE BiH  
Mr. Vladimir Šoljić, s.r.